



Iesus ayant mangé l'Agneau de Pasques avec ses Apostres, institue le saint Sacrement de son Corps & Sang.

LESVS scachant l'heure estre venuë qu'il deuoit estre liuré à la mort, fit la Pasques avec ses Disciples, & ainsi qu'ils estoient assis à table, & qu'ils mangeoient, il fut troublé en esprit, & protesta, disant : En verité, en verité, ie vous dis que l'un de vous me trahira. Ils furent tous contristez, & dirent l'un apres l'autre : Seigneur, est-ce moy ? mais luy répondant dit, Celuy qui a mis la main au plat pour tremper avec moy, me trahira. De vray le fils de l'homme s'en va, comme il est écrit de luy ; mais mal-heur à cet homme-là par lequel il est trahy. Il eust esté bon qu'il n'eust iamaïs esté nay. J'ay grandement desiré de manger cette Pasques avec vous, auant que de souffrir. Or comme ils mangeoient, Iesus prit du pain, & apres qu'il eut rendu grace, il le rompit, & le donna à ses Disciples, & leur dit : Prenez & mangez, cecy est mon Corps, qui est liuré pour vous ; faite cecy en memoire de moy. Semblablement apres qu'il eut soupé, il prit la Coupe, & rendit graces à Dieu, & leur donna, disant, Beuvez-en tous ; car c'est cy mon sang du nouveau Testament, qui sera épandu pour vous, & pour plusieurs, en remission des pechez.